



## INTRODUCZIUN

DAD URSICIN G. G. DERUNGS-BARTOLOMEI

*Il raquen de Marta e Maria s'auda denter ils pli enconuschents ord igl evangelii. E forsa era denter ils pli commentai – ed ils pli malcapi. Ella tradiziun cristiana ein quellas duas dunnas d'entradas figuras simbolicas per la veta activa (Marta) e la veta contemplativa (Maria). Ils uordens monastics contemplativs ein sereferi sin la figura de Maria che teidla giudapeis al Segner il plaid de Diu. Da tschei maun fuss Marta deputada da Jesus sco figura simbolica della veta activa. Mo igl ei buc aschia! Oravontut ei Maria dapli che mo figura contemplativa. Giudapeis al Rabbi steva il discipel. Cheu vein nus Maria sco discipula alla pari culs discipels. E lu Marta. Ella survegn buca ina part, ina «rolla» el giug evangelic, parallela a quella de Maria. Anzi, ella vegn criticada ella mesira ch'ella semetta en concorrenza cul tedlar il plaid de Diu! «Pertgei mo ina caussa ei necessaria» (Siu survetsch ei secapescha impurtonts; quei ei presupponiu, mo ei cheu buca in tema evangelic).*

*E la finala: «far quitaus per bia caussas»: quei ha ina significaziun generala, humana, buca mo evangelica. Igl ei la malsogna dil «buc saver viver», da cuorer suenter «bia caussas», da perder sesez – aunc avon che perder il Plaid de Diu.*

## EVANGELI

Mc 6,30–34

<sup>30</sup>Il apostels ein serimnai tier Jesus ed han rapportau ad el tut quei ch'els vevan fatg e tut quei ch'els vevan perdegau. <sup>31</sup>Cheu ha el detg ad els: Vegni vus dapersei en in liug solitari e ruassei empau. Pertgei quels che vegnevan e quels che mavan fuvan aschi numerus, ch'els apostels vevan gnanc peda da magliar. <sup>32</sup>Els ein pia serendi cun barca en in liug solitari tut persuls. <sup>33</sup>Mo ins ha viu els a mond naven. Biars han encurschiu quei, e da tut ils marcaus ein ei caminai a pei en quei liug ed ein stai leu avon ch'els. <sup>34</sup>Descendend dalla barca, ha Jesus viu ina gronda fuola, ed el ha giu cumpassiun dad els, pertgei ch'ei fuvan sco nuorsas senza pastur. Ed el ha entschiet ad instruir els bia.